

04/03/1998

Usah gopoh batal larang jualan singkat

Kamal Ahmad

PETALING JAYA, Selasa - Kerajaan tidak akan terburu-buru untuk menarik balik larangan ke atas jualan singkat yang dikenakan di Bursa Saham Kuala Lumpur (BSKL) kerana ia boleh menjejaskan pasaran saham yang agak stabil sekarang.

Datuk Seri Dr Mahathir Mohamad berkata, kajian semula untuk membatalkan larangan itu memerlukan pertimbangan teliti supaya pasaran saham tidak berbalik kepada arah aliran menurunnya.

"Kita selalu berasa kerana keadaan sudah baik, maka kita boleh hentikan sesuatu yang sebenarnya menyumbang kepada kebaikan itu. Jadi, apabila kita tarik balik, ia mungkin balik kepada keadaan asal... saya tak tahu.

"Tetapi kita jangan tergesa-gesa sangat hendak pergi balik kepada cara lama dahulu menyebabkan kita menghadapi masalah," katanya mengulas kemungkinan kegiatan jualan singkat dibenarkan semula di BSKL berikutan bursa itu semakin stabil.

Jualan singkat merujuk kepada penjualan saham yang tidak dimiliki seseorang dengan harapan membelinya pada harga lebih murah kemudian untuk memperolehi keuntungan.

Di bawah bentuk jualan singkat terkawal, pelabur perlu mempunyai kemudahan pinjaman saham dan pemberian pinjaman bagi memastikan tiada penjualan singkat tidak berjaminan berlaku.

Pengerusi Suruhanjaya Sekuriti (SC), Datuk Dr Munir Majid baru-baru ini berkata, SC sedang mengkaji semula larangan ke atas jualan singkat saham-saham tempatan berikutan BSKL telah stabil.

BSKL membenarkan satu bentuk jualan singkat terkawal bagi 50 saham yang diluluskan dari 1996. Bagaimanapun, ia dilarang sejak Ogos tahun lalu apabila berlaku kemerosotan berpanjangan pada harga saham ekoran kegawatan mata wang serantau.

Mengulas lanjut kajian untuk menarik balik larangan jualan singkat, Perdana Menteri menyifatkan BSKL adalah umpama orang yang baru sembuh daripada sakit disuruh berlari.

"Tindakan itu adalah tidak wajar kerana kesan kepada orang berkenaan mungkin bertambah buruk jika dia terjatuh dan kedua-dua kakinya patah," katanya.

Dalam perkembangan berkaitan sebelum ini, kalangan penganalisis yakin langkah mengkaji semula larangan jualan singkat mampu meningkatkan keyakinan pelabur, sekali gus membantu pemulihan di pasaran saham tempatan, yang kini masih berlegar di sekitar 700 mata.

Menurut mereka, langkah itu juga menunjukkan kesungguhan pihak berkuasa dalam usaha menarik kembali pelabur, terutama pelabur asing ke pasaran tempatan di samping pelbagai langkah lain seperti siri perjumpaan dengan pengurus dana asing.

Presiden BSKL Datuk Salleh Majid ketika mengulas cadangan itu baru-baru ini berkata, kajian semula SC itu mungkin bermaksud bahawa larangan jualan singkat boleh dibatalkan.

(END)